

SASKIBALOIA

Lasaitasuna

Taugresek partidu erraza du gaur Gasteizen Poloniako Nobilesen aurka

Taugresek partidu erraza jokatu du gaur Araba pabilioian Poloniako Nobiles taldearen aurka, eta giro lasaia da nagusi Baskoniak lehen bost neurketak irabazi dituelako eta poloniarrek etxetik kanpo indarra galtzen dutela ikusita. Baliteke Santi Abaden lesioak soilik ekartzea buruhausterik.

LUIS KARLOS GARCIA / GASTEIZ

Santi Abadek lesioa osatzeko egun batzuetako atsedena baino ez du behar, ez baita larria. Baina Taugresen egutegiko partidu metaketak galarazten du edozeinek berea gainditzea. Hegalak herenegun ez zuen Gironan jokatu eta litekeena da datorren igandera arte kantxara ez itzultzea, Ligan Joventut hartzeko partidura arte, hain zuzen. Oraingo azken segundura arte itxaron beharra dago. Abadek berak esan duenez: «Uste dut poloniarren aurka jokatzeko moduan izango naizela baina azken unea iritsi arte ez dugu erabakiko».

Abad 'atzerritarra' da Europan, bere errendimendu bikainari erreparaturik behintzat. Rigang apal ibili zen (15 puntu), aurreko partiduan Benettonen aurka bezala (7), baina turkiarrei egundokoa egin zien (34) eta ligatxo osoan erabakigarri bilakatu da. Lehendabizikoan Polonian, kasu, onenetakoa izan zen Nobiles taldeari 80-88 nagusitu ahal izateko.

Lesioak lesio, eta Ramon Ri-



Rivas eta Nicola igandean Valviren aurka jokatuako partiduan. EFE

vasek berak ere arazotxoren bat baduen arren, lasaitasun giroa erabatekoa da Gasteizen Nobilesen aurkako partidua dela eta. Aspaldiko partez ez zegoen horrelakorik, beti ere zailtasunak daudelako, baina oraingo honetan inork ez du oztoporik ikusten. Bi dira arrazoi nagusiak: bata Nobilesek indarra galtzen duela etxetik kanpo, bestea Baskoniak nagusitasuna ageri duela lehen bueltako guztia irabazita.

Poloniako taldea balekoa da

etxean. Lehen jardunaldian Taugresen kontra porrot eginik ere, geroztik Hapoeli (82-81) eta Fenerbahceri (95-83) irabazi die. Kanpoan, ordea, ez du maila eskaini eta aipatzekoa da Trevison jipoi ederra jaso zuela (111-81).

Taugresek, bestetik, zein den ederki asko erakutsita dauka ligatxoan. Dena irabazi du eta orain etxean pare bat ahalegin txiki —Nobiles eta Hapoel— egin behar ditu lidergoari eusteko. Ildo horretan, gutxika-gutxi-

ka Laso, Perasovic, Rivas eta Greenek protagonismoa galduz joan behar dute Ferran Lopez, Iñaki Gomez, Pedro Rodriguez eta Rafa Talaveronek lekukoa har dezaten.

Gaur arratsaldeko 19.55etan hasiko den partiduan —ETB-1ek zuzenean emango du— Nobileseko honako jokalariek hauek ikusiko dira poloniarren oinarri: Olaszewski hegala eta Jankowski pibota, biak ere internacionalak Polonian; gainera, Wardach pibot zabala zona barruan ariko da; azkenik Zeludok eta Griszczuk hurrenez hurren hegala-pibot eta eskolta bielorrusiarrak, taldeko atzerritarrak direnak.

GASTEIZTIK
MUGITU
BARIK

Lasaitasuna, beste mota batekoa ere bada edo izango da Gasteizko taldean, datozen hiru partiduak etxean jokatu direnez taldeak ez baitu bidaiarik egin beharko hilaren 21era arte, Madril aldera joango denean, hain juxtu. Taugresek Gironan jokatu eta irabazi egin zuen herenegun Valviren aurka (75-90). Lehen zatian Manel Comasen jokariak nekatuta ibili ziren. «Rigako bidaiaren eragina sumatu zen lehen zatian», esan du Marcelo Nicolak Pablo Laso edo Velimir Perasovic kantxan nola ikusi zituen adierazteko.

Orain atsedena hartzeko, entrenamenduak hobeto egiteko nahiz arazo fisikoak ahaztuz joateko aukera ona daukate, aurkari hauek hartuko baititu bata bestearen ondorengotik Araba pabilioian: gaur Poloniako Nobiles, igandean Kataluniako Joventut, eta gaur zortzi Israelgo Hapoel.

Europako
txapelketarako
zozketa
egin zen atzo

ATENAS

Aurtengo udan Grezian jokatu den Europako saskibalo txapelketarako zozketa egin zen atzo Atenasen. Ekainaren 21etik uztailetik 2ra bitartean jokatu den txapelketa honetan bi multzotan banatuta egongo dira parte hartuko duten selekzioak. A multzoan Suedia, Grezia, Italia, Alemania, Lituania, Israel eta sailkapen faseko irabazlea izango dira. B multzoan Errusia, Kroazia, Espainia, Frantzia, Finlandia, Eslovenia eta sailkapen fasean bigarren postuan sailkatzen den taldeak jokatu dute. Fase honetan, orain dela gutxi nazioarteko lehiaketara itzuli den Jugoslaviako selekzioa da faboritua. Multzo bakoitzean, selekzio guztiek elkarren aurka jokatu dute lehen fasean. Bigarren fasera lau talde pasatuko dira multzo bakoitzetik.

EUROPAKO TXAPELKETA

A Multzoa:

Errusia
Kroazia
Espainia
Frantzia
Finlandia
Eslovenia
Sailkapen multzoko 2a.

B Multzoa:

Suedia
Grezia
Italia
Alemania
Lituania
Israel
Sailkapen multzoko 1.a

RUGBYA

Dijonen Baiona garaile elur artean

KOLDO ALDUNTZIN / DONOSTIA

Ligako azken partiduak jokatu dira asteburu honetan. Hamalagarren jardunaldiko garaipenak ez dio txartela lortzeko balio izan Baionari. Alpeetako Dijonen 14-20 nagusitu zen. Dijongo berdegunea izoztuta eta elur zuriaz estalita zegoen. Hala ere, jokatzera erabaki zuten azken partidua baitzen gainera.

Bi taldeetan indarra eta eten gabeko jokoa da nagusi. Lapurtarrak motibazio handiagoz zelairatu ziren eta norgehiagokan zehar indartsuago jardun zuten. Aussel mele erdiak bi entseiu egin zituen aurreneko zatian eta bat Drouhinek, etxekoentzat. Bigarren zatian, Salles harroinak egin zuen Baionakoen entseiu.

Miarritzek ohorea besterik ez zuen jokoan, jarraitzaileen aurrean. Ohorea eta Lagisquet-en estreinukoa entrenatzaile postuan. Joko eskasa egin arren, Valence d'Agenen aurka 18-13ko irabaziz esan zion adio aurreneko faseari B multzoan. Lapurtarrak pisutsuagoak eta indartsuagoak ziren aurrean eta horri esker baloi gehiago eskuratzeko aukera izan zuten. Hala eta guztiz ere, kanpotarrek egin zuten partiduko entseiu bakarra. Etxekoen puntu guztiak zigor kolpeztu zituzten.

Hemendik aurrera 16 talde lehiatuko dira ohorezko saria bereganatzeko: Perpignan, Toulouse, Narbonne, Montpellier, Brive, Bourgois, Racing, Castres, Begles, Dax, Agen, Nimes,

Grenoble, Toulon, Rumilly eta Colomiers. Kanpoan geratu direnek Moga Kopa jokatu dute.

B multzoan, PUC eta Donibane Lohizunen arteko partidua ez zen jokatu Parisen. Baigorri garaipen historikoa lortu zen Tulleren aurka 19-3. Garaipen honekin, ziurtatu egin zuen hurrengo faserako txartela. J. M. Ocafrainek lortu zituen sei puntuak eta atsedenaldira 6-0 aurretik zirela heldu ziren. Azkenean, Etxenike bigarren lerroak egin zuen ohorezko entseiu minutu baten faltan.

Bokalek denboraldiko bigarren garaipena lortu zuen Miellanen aurka, 23-12, eta Garazik galdu egin zuen Limoges-en, 20-16. Jean Michel Gonzalez Baionan ari den kanboarra, be-



J. M. Gonzalez.

rriz, V Nazioetako txapelketan aritzeko deitu dute.

GETXOK
AMORE
EMAN GABE

Hegoaldekoari dagokionez, Xerox Getxok arazorik gabe gainditu zuen Mer-

cabarna talde katalana 21-5. Hasieratik ekin zioten erasoari bizkaitarrek, eskuko jokaldi ikusgarriak eginez. Horren frogagisa, Gorka Urrutiak eginiko bi entseiuak lehen zatian. Bigarren zatian zakartu egin zen jokoa eta entseiuak egiteko aukera garbirik ez zen izan. Hamabostekoan, Etxebarria eta Laskurainekin batera, Manzano eta Jimenez falta ziren.

Bera-Berak galdu egin zuen Sevillan. El Montek 42-3 irabazi zion. Zati bakoitzeko hastapeneko minutuetan erabaki zuten partidua. Etxekoek zazpi entseiu egin zituzten. Bera-Beran Castillon eta Haranburu falta ziren eta baita Gorosabel eta Gari Lizartza ere. Isasa, aldiz, hamabostekoan aritu zen berriro. Lehen mailan, Gernikak 46-7 irabazi zion Iruni, Gaztedik 43-8 Zaragozari, Bilbao 5-13 Ordizari eta Iruña eta Mungiak 10na berdindu zuten.